

1. Xuan Cabrita

- Llugar: Quintanal, MIRANDA.
- Narrador: Francisco Menéndez Troteaga, 82 años (2000).
- Recopilador : J. S. L.

Coñu, eso era... eso pasóu ahí... ahí nesas brañas d'ahí de La Peral, de d'arriba La Pola. Sí, cuntéitelu, home, eso yá lu grabesti... Era allá por San Pedru, ya vieno... había un paisanu nuna cabaña d'esas ya... claro, taban las vacas polos puertos, ya era... ya... pues taba ahí ya vieno un ramalazu d'esos de tuena, de piedra, ya entonces pues, claro, él taba metíu na cabana ya cuando salió vioulu todú blancu de piedra, el ganáu fuera... ya las patatas yá taban yá grandes ya todú, ya con eso... cuoñu, quedóuse... ya entonces... allí na puerta... ya entonces vien un home pequenu con un sumbrei-racu negru... ya acercóuse a él, ya *díjole*:

—¿Qué hai, *hombre*?

Claro, el vaqueiru taba de malhumore, ya entonces... al ver el pedraz. Ya entonces dixo él:

—¿Tienes algo prehí de comere?

—¡Coñu!, ¿yo aquí qué voi tener, ho? Aquí únicamente... *leche* ya boroña.

—¡Coñu, venga p'acá!

Ya entonces fartucóulu de leche ya boroña. Ya entonces el vaqueiru... *díjole* el renubeiru:

—Llévate bien con todos, hasta colos renubeiros, porque suelen llevar l'agua pa los praos de los amigos ya pa los de los enemigos la piedra.

Ya dixo él:

—¡Coñu, sí que me jodisti!

—Si dacuando vas por Egipto, preguntas por *Juan Cabrita*.

Bueno, pues la vida yá sabes que *tiene* sus problemas... él por probar fortuna pues fue por ahí buscando trabajo, ya por un país a otru a ver si encontraba algo... ya, coñu, cuando se diou cuenta taba n'Egipto. Ya entonces él preguntóu...

—¿Y *Juan Cabrita* dónde vive?

—Allá, allá vive, vaya a tal sitiú... —*dice*— *joye, enséñale a éste...* —*la gente mui atenta*— adonde vive *Juan Cabrita*!

Ya entonces, coñu, fonon pasándolu d'unos a outros hasta que llegóu...

—¡Ahí, ia esa la casa de *Juan Cabrita*!

Yá taba no corral, ya salíu *Juan Cabrita* ya, claro, acordábase de que lu fartucara de *leche* ya boroña. Ya entonces... ¡coñu, venga!, llamó a la muyere... mandóulu entrar ya llamó a la muyer y dice:

—¡De comer pa esti *hombre*!

Salió una *mujer* mal encarada, claro, taba fea ya mal encarada... ¡taba casada col renubeiru! Ya entonces la renubeira amuñóu... amarmuñóu polo *baju*, ya él, claro, nu[n] entendió, ya entonces *díjole*'l renubeiru:

—¡D'esto no[n], d'esto no[n]!

Empicipiaron a salir prellí culebras ya sacaveras ya sapos ya todú. Ya entonces dixo él... claro:

—¡Coñu, no[n]!, ¡de comer!, ¡de comer pa esti *hombre*!

Ya entonces... claro, el renubeiru comprendió aquello, ya entonces vase ya *trajo* una alcofaina llena d'augua ya *díjole*:

—¿Serás pa saltar esta alcofaina?

—¡Sí, *hombre*!

¡Buf! Pegóu un saltu pal outru *lau* ya foi posase al escalón de casa cuando la muyere salía a casase con outru vaqueiru.

¡Bueno!, ¿ves tu, eh? Eso cuéntaslu así a *gente* qu'eso ya dicen ¡ui!

—¿Y eso fue verdá, Francisco?

—Eso sí, *hombre*. Coñu, ¿nun ves que los renubeiros dante buenos *consejos*? Tienes que llevate bien con todos, con los... porque si sos... si nun te llevas bien con todos... ya con los renubeiros tamién. Los renubeiros ¿nun sabes lu que son? Son esos de las truenas, ya por eso aquellos nu[n] los quería bien, pero llevóu-llys la piedra, ya pa lu de los amigos llévala l'augua de tuena.

Yá ves tu como hai preferencias. Y aquel del diablu tamién. ¿Nun viste'l diablu?, pues el diablu tamién, ¿nun ves cómo tentaba? Y aquel *hombre* que taba aburríu... ¿ves cómo le solucionóu las cosas? ¡Fízolu ricu! Bueno, anda, vamos yendo p'allá riba porque... el tiempu pasa.



1. *Xuan Cabrita*

FRANCISCO MENÉNDEZ TROTEAGA

Quintanal, MIRANDA

Semeya: J. S. L.

